

Titah KDYMM Sempena Sambutan Hari Ulang Tahun Angkatan Bersejata Diraja Brunei yang ke-58 Tahun

**TITAH
KEBAWAH DULI YANG MAHA MULIA PADUKA SERI BAGINDA
SULTAN HAJI HASSANAL BOLKIAH MU'IZZADDIN WADDAULAH IBNI
AL-MARHUM SULTAN HAJI OMAR 'ALI SAIFUDDIEN SA'ADUL KHAIRI WADDIEN,
SULTAN DAN YANG DI-PERTUAN NEGARA BRUNEI DARUSSALAM**

**SEMPENA
SAMBUTAN HARI ULANG TAHUN ANGKATAN BERSEJATA DIRAJA BRUNEI
YANG KE-58**

**BETEMPAT
KEMENTERIAN PERTAHANAN,
ANGKATAN BERSEJATA DIRAJA BRUNEI
BOLKIAH GARISON,
NEGARA BRUNEI DARUSSLAM**

**PADA
HARI AHAD,
26 SYAWAL 1440 / 30 JUN 2019**

Assalamu'alaikum Warahmatullahi Wabarakatuh
Bismillaahir Rahmaanir Raheem

Alhamdulillah Rabbil 'Alameen, Wabihiee Nasta'eenu 'Alaa Umuuriddunya Wadden, Wassalaatu' Wassalaamu 'Ala Asyarafil Mursaleen, Sayyidina Muhammaddin, Wa'alaa Aalihee Wasahbihee Ajma'een, Waba'du.

Beta bersyukur, kerana dapat sama-sama berhimpun pada pagi ini, untuk memperingati Hari Ulang Tahun Angkatan Bersenjata Diraja Brunei ke-58 Tahun. Perhimpunan alhamdulillah, berlangsung dalam suasana aman dan meriah.

Keamanan adalah nikmat besar dari Allah, yang dengannya, membolehkan kita membangun dengan selesa. Adapun Angkatan Bersenjata Diraja Brunei adalah tonggak utama bagi keamanan. Kita amat beruntung dikurniakan keamanan, dimana tanpa keamanan, semua usaha pembangunan sukar untuk dilaksanakan. Dan dengan adanya pembangunan pula, kenikmatan hidup pun dapat dirasakan. Namun kita mesti sedar, bahawa kenikmatan itu, janganlah ia melalaikan kita, demi mengingat, bahawa ancaman-ancaman global adalah dinamik, cepat dan merentas sempadan.

Di antara ancaman-ancaman tersebut, termasuk pemersionan ideologi kepada radikalisme, keselamatan maritim dan siber, kegiatan-kegiatan penyeludupan dan seumpamanya. Semua ini adalah cabaran-cabaran berat untuk dihadapi.

Dari itu, tahap kewaspadaan kita perlu ditingkatkan dari masa ke semasa. Ia mustahak konsisten tanpa ada titik noktahnya. Tidak diragukan lagi, Angkatan Bersenjata Diraja Brunei adalah pemegang utama peranan itu di sini.

Dalam usaha Diplomasi Pertahanan, Angkatan Bersenjata Diraja Brunei telah membuktikan inisiatifnya yang cemerlang melalui penglibatan di arena antarabangsa, meliputi penglibatan-penglibatan di Internasional Monitoring Team (IMT) di Mindanao, Selatan Filipina, di United Nation Interim Forces in Lebanon (UNIFIL) dan di Independent Decommissioning Body (IDB) di Mindanao, Filipina. Ini semua

memberi image baik, bukan sahaja kepada ABDB malahan juga kepada Negara.

Apa jua penglibatan adalah ia sumbangan signifikan dan testimoni komitmen Negara terhadap keselamatan serantau dan sejagat. Ia mustahak diteruskan selagi diperlukan.

Namun ini saja tidaklah memadai, tanpa adanya strategi pertahanan yang menyeluruh untuk menangani segala macam ancaman kontemporari. Kerana itu, mengenai pengemaskinian Kertas Putih Pertahanan, Beta menyarankan, supaya ianya disejajarkan dengan pelan strategik negara dan penggunaan kaedah Whole of Government Approach, untuk perkembangan Angkatan Bersenjata Diraja Brunei dapat dirancang secara holistik bagi mengurangkan jurang keupayaan mengikut keutamaan. Perancangan sedemikian ini diharapkan dapat menghasilkan keselamatan negara secara menyeluruh tanpa kompromi.

Beta juga berharap melalui pengemaskinian Defence Science and Technology Policy Framework akan dapat menghasilkan pula bakat-bakat inovasi yang sedia ada di kalangan para anggota ABDB.

Namun dalam pada itu, perlu juga diingat, kejayaan tidak akan dapat dicapai hanya dengan kekuatan fizikal sahaja, tetapi kekuatan sebenar turut bertunjang pada sifat-sifat dalaman, seperti setia, ikhlas, amanah dan berani. Apabila ada sifat-sifat ini, nescaya kejadian-kejadian pelanggaran tidak akan berlaku, khasnya pelanggaran sekuriti. Semua orang mesti tahu, bahawa pelanggaran sekuriti boleh menggugat keupayaan Angkatan Bersenjata Diraja Brunei.

Maka kerana itu, inilah pentingnya mengamalkan etika kerja jujur, setia dan amanah itu.

Akhir kata, dengan segala usaha dan ikhtiar, kita juga berdoa, semoga Allah Subhanahu Wa Ta'ala memberkati Angkatan Bersenjata Diraja Brunei.

Di kesempatan ini juga, Beta mengucapkan tahniah kepada semua warga Angkatan Bersenjata Diraja Brunei, sama ada mereka yang berada di dalam atau di luar negara, yang masih berkhidmat mahupun yang telah bersara. Tahniah khusus pula kepada mereka yang menyertai perbarisan pada pagi ini, yang mencerminkan ketangkasan Angkatan Bersenjata Diraja Brunei yang menjadi lambang kebanggaan kita. Ucapan Tahniah dan syabas juga tidak dilupakan untuk Jawatankuasa dan malah semua yang terlibat dalam menjayakan Sambutan Hari Ulang Tahun Angkatan Bersenjata Diraja Brunei yang ke-58 Tahun ini.

Sekian, Wabillahit Taufeq Walhidayah, Wassalamu 'Alaikum Warahmatullahi Wabarakatuh.